



BOSNA I HERCEGOVINA  
PARLAMENTARNA SKUPŠTINA  
BOSNE I HERCEGOVINE  
**PREDSTAVNIČKI DOM**

Broj: 01-011-60/01

Sarajevo, 22. 02. 2001..

**Z A P I S N I K**

sa 4. sjednice Predstavničkog doma Parlamentarne skupštine Bosne i Hercegovine,  
održane 22. februara 2001. godine

Četvrta sjednica počela je s radom u 11,15 sati. Prisustvovao je 41 poslanik. Odsustvo je opravdao poslanik Amor Mašović, kao i predsjedavajući Vijeća ministara g. Martin Raguž zbog službenog puta.

Pored poslanika sjednici je prisustvovao član Predsjedništva Bosne i Hercegovine g. Halid Genjac, jedan broj ministara u Vijeću ministara BiH, predstavnici OHR, predstavnici OSCE-a i drugih međunarodnih organizacija.

Sjednici je prisustvovala i grupa parlamentaraca iz evropskih zemalja, na čelu sa gospođom Haneken Gelderbrom, koja je boravila u BiH radi pružanja podrške Parlamentu Bosne i Hercegovine.

Predsjedavajući Doma dr Sead Avdić, nakon što je pozdravio poslanike i goste, dao je par uvodnih napomena u vezi s sazivanjem 4. sjednice i prijedlogom dnevnog reda. Upoznao je poslanike da je sjednica s predloženim dnevnim redom sazvana uz saglasnost dva člana Kolegija, a da je treći član Kolegija Mariofil Ljubić opravdao odsustvo sa sjednica Kolegija. Skrenuo je pažnju poslanicima da su dobili Odluku Predsjedništva BiH o imenovanju g. Božidara Matića za predsjedavajućeg Vijeća ministara, kao i Pravno mošljenje Ureda Visokog predstavnika o postupku nominacije predsjedavajućeg Vijeća ministara. Takođe je predsjedavajući Avdić skrenuo pažnju poslanicima da su dobili dopis Kluba poslanika HDZ-a u vezi s njihovim učešćem u aktivnostima Predstavničkog doma, te stav Kluba hrvatskih delegata Federacije BiH prethodnog saziva o Odluci hrvatskog člana Predsjedništva BiH o proglašenju Odluke Predsjedništva destruktivnom po vitalne interese hrvatskog naroda. U vezi s stavom Kluba hrvatskih delegata Avdić je rekao da je tehničkom ovjerom rezultata opštih izbora, 27.11.2000. godine, istekao mandat svim poslanicima i delegatima.

Poslije ovih napomena predsjedavajući Doma je otvorio raspravu o prijedlogu dnevnog reda.

Predsjedavajući Kluba poslanika HDZ-a **Ivo Andrić – Lužanski**, u diskusiji povodom prijedloga dnevnog reda, rekao je da se u pripremama za predloženu tačku dnevnog reda radi o grubom kršenju Poslovnika. Skrenuo je pažnju predsjedavajućem Doma da je on osoba koja najčešće i najgrublje krši Poslovnik, iako ima obavezu da ga štiti od drugih poslanika, pa čak i tumači. I. Andrić je govorio pojedinačno o odredbama Poslovnika koje je predsjedavajući uzeo kao osnovu za sazivanje sjednice, pa je naglasio da predsjedavajući nije bio u mogućnosti da sazove ovu sjednicu niti bez Kolegija niti bez konsultacija, te da se nisu stekli uslovi za održavanje sjednice. Naglasio je da Odluka jednog člana Predsjedništva mora proći proceduru propisanu članom V.2.d) Ustava Bosne i Hercegovine, kao i to da predsjedavajući Doma krši i Ustav BiH, što svjedoči poziv za sjednicu koji je upućen 19.02.2001., što znači da se nije sačekao ni Ustavom predviđeni rok. Prigovorio je i da je Odluka Predsjedništva dostavljena poslanicima prije nego je

objavljena. Gospodin Andrić je komentarisao i Pravno mišljenje Ureda Visokog predstavnika. Istakao je da će Dom svjesno prekršiti Ustav ako se danas izvrši odobrenje imenovanja predsjedavajućeg Vijeća ministara. Rekao je da bi se Kolegij morao danas očitovati o njegovim pitanjima, te da Klub poslanika HDZ-a, zbog svega što je iznio, ne može prihvatiti prijedlog dnevnog reda i pozvao i druge poslanike da ga ne prihvate.

Predsjedavajući **Sead Avdić** odgovorio je poslaniku Andriću - Lužanskom da je sjednica sazvana po čl. 47.stav 3. i da predsjedavajući može u hitnim slučajevima sazvati sjednicu. Da je sjednica hitna nalazi uporište u čl. 115. Poslovnika. S obzirom da se Kolegij ni u dva pokušaja nije mogao sastati dozvolio je sebi slobodu, koristeći i poslovničku mogućnost, da sazove sjednicu, rekao je Avdić. Naglasio je da Odluka Predsjedništva nije upitna za Predstavnički dom i prihvatamo je kao legitimnu i legalnu, te da je OHR isključivi tumač Ustava Bosne i Hercegovine, te da je u tom kontekstu i dao Pravno mišljenje.

Poslanik **Mirko Banjac** je, između ostalog, rekao da se za riječ javio ne da govori o dnevnom redu, nego da reaguje na kršenje Poslovnika. Rekao je da je predsjedavajući grubo prekršio Poslovnik i krivo tumačio član 115., jer član 115. kaže da se odmah saziva sjednica, a član 47. kaže kako se to radi.

Član Kolegija **Mariofil Ljubić**, između ostalog, rekao je da na sjednicu Kolegija nije došao iz tehničkih razloga, jer je poziv dobio u petak u 16,32 sati, kada nije bio na radnom mjestu, a u ponedjeljak je imao druge obaveze. Rekao je da će glasati protiv dnevnog reda jer smatra da se nisu stekli ustavni uslovi i ustavne ingerencije ni Predsjedništva ni Predstavničkog doma. Naglasio je da za njega ovo nije proceduralno, već da je ovo suštinsko ustavno pitanje i pitanje ravnopravnosti naroda u BiH.

Poslije prednjih diskusija predsjedavajući Avdić je dao na glasanje prijedlog dnevnog reda.

Od 41 prisutnog poslanika ZA prijedlog dnevnog reda glasalo je 29, PROTIV 5, a 7 poslanika se suzdržalo. Po entitetima, iz FBiH ZA su glasala 22, a iz RS 7 poslanika.

Predsjedavajući je konstatovao da je za 4. sjednicu usvojen sljedeći

#### **DNEVNI RED:**

1. Konstituisanje Vijeća ministara Bosne i Hercegovine;
  - a) odobrenje imenovanja predsjedavajućeg Vijeća ministara,
  - b) odobrenje imenovanja ministara i zamjenika ministara

#### **Ad – 1.a) Odobrenje imenovanja predsjedavajućeg Vijeća ministara Bosne i Hercegovine**

Predsjedavajući Sead Avdić pročitao je Odluku Predsjedništva o imenovanju Božidara Matića za predsjedavajućeg Vijeća ministara, a potom je **Božidar Matić** podnio svoj politički program.

Poslije izlaganja B. Matića, predsjedavajući Kluba poslanika HDZ Ivo Andrić – Lužanski se javio za riječ. Rekao je da je neprimjereno da raspravljamo o nečemu što poslanici nisu dobili u pisanoj formi. Stoga je zatražio pauzu da bi se poslanicima dostavio izneseni program u pisanoj formi.

Božidar Matić je objasnio razloge zašto nije dostavio program u pisanoj formi, rekavši da je prioritet dao konsultacijama, te da je sve što je iznio napisano, ali u tri

dijela, te da nije uspio sklopiti u cjelovit tekst zbog kratkoće vremena. Rekao je da je zamolio skupštinsku službu da da' tekst koji će on autorizovati.

U diskusiji povodom izlaganja predsjedavajućeg Vijeća ministara učestvovali su poslancii: Miro Grabovac – Titan, Mirko Banjac, Ivo Andrić – Lužanski, Mariofil Ljubić, Ibrahim Đedović, Dušan Stokić, Osman Brka, Tihomir Gligorić, Adem Borić, Momir Tošić i Abdurahman Malkić.

Poslanik **Miro Grabovac – Titan** na početku svoje diskusije prvo upozorio na kršenje Poslovnika Predstavničkog doma i Ustava Bosne i Hercegovine, naglasivši da nije uopšte uspostavljen zakonodavni dio vlasti. Rekao je da je očito da se ovdje trenira demokratija, te da oni iz HDZ-a dobro znaju šta je demokratija, šta je glas više i u kojem se pravcu ide. Zapitao je da li je to moralno i je li to ono što daje Bosni i Hercegovini prosperitet? Dalje je govorio o pojedinim dijelovima programa, koliko je mogao shvatiti, jer, kako je rekao, nema pred sobom pisani tekst da bi mogao isčitati. O programu je iznio svoje mišljenje rekavši da je ovo bilo više stranačko očitovanje i da je to pogrešna koncepcija.

Poslanik Grabovac je rekao da misli da bi Matić trebao povući svoje izlaganje i iz moralnih i iz istorijskih razloga, i radi dobrobiti Bosne i Hercegovine, kao i da bi trebao odustati od toga mjesta. Jer, da bi neko iz reda hrvatskog naroda mogao biti na tome mjestu trebalo bi da ima barem 50% podrške biračkog tijela hrvatskog naroda. Predložio je Matiću, kao i svim predstavnicima hrvatskog naroda, da ne učestvuju u istorijskom činu koji će biti negativno zapisan. Apelovao je da se sačeka konstituisanje Doma naroda FBiH i da se vidi šta će taj dom kazati, da se ispoštuje procedura. Izrazio je bojazan da se ne napravi greška koja će brisati jedan konstitutivni narod, a time dovesti u pitanje i suverenitet Bosne i Hercegovine, rekao je, između ostalog, Miro Grabovac Titan.

Poslanik **Mirko Banjac** u svojoj diskusiji, između ostalog, rekao je da je očekivao da će predsjedavajući iznijeti operacionalizovane programske osnove i pravce razvoja po oblastima, ali da je ovo što je čuo “kraća komparativna analiza globalnog stanja ekonomije u zadnjih šest mjeseci u ekonomskim časopisima, sa kraćim osvrtom na obrazovanje”. Prigovorio je što predsjedavajući Matić nigdje nije rekao da će se pridržavati dejtonskih i ustavnih kategorija u oblasti ekonomije u BiH. Naglasio je da je dosta kršenja Dejtonskog sporazuma i Ustava. “Mi hoćemo da to postane osnova života i suživota na ovim prostorima”, naglasio je M. Banjac. Izrazio je očekivanje da će se poslanici Alijanse držati istog načela kojeg su se držali prilikom diskusije o programu M. Raguža na prethodnoj sjednici.

Poslanik **Ivo Andrić - Lužanski**, u ime Kluba poslanika HDZ-a, između ostalog, rekao je da je demokratija teror većine nad manjinom, naglasivši da je na prošloj sjednici učinjen krupan korak u uvođenju Bosne i Hercegovine u građansku demokratsku državu, ali se, naravno, nije vodilo računa da je na taj način negirana volja jednog od jednakopravnih, suverenih i konstitutivnih naroda u BiH, koji je na izborima dao podršku određenim političkim strankama koje imaju pravo i snagu da ga predstavljaju u ovom parlamentu. “U ovako složenoj državi kao što je Bosna i Hercegovina, kada jedan narod ostane bez Ustavom zagarantovanih prava, ni ostala dva naroda neće imati sreću u takvoj državi”, rekao je, između ostalog, Ivo Andrić – Lužanski i zapitao se: “Gdje je tu ravnopravnost ako dva člana Predsjedništva BiH i ovaj parlament, većinom bošnjačkih i srpskih glasova ne da' povjerenje onome koga kandiduje hrvatski narod, a daće podršku nekome ko nema ni 10% podrške hrvatskog biračkog tijela?”

Na kraju diskusije Andrić je, u ime Kluba poslanika HDZ-a, rekao da oni kao legalno i legitimno izabrani poslanici iz reda hrvatskog naroda, i kao pobjednici na proteklim opštim izborima, napuštaju sjednicu zbog kršenja Poslovnika i Ustava i zbog atmosfere koja ovdje vlada.

Drugi zamjenik predsjedavajućeg Predstavničkog doma, Mariofil Ljubić, rekao je da on neće sjednicu napustiti dok ne kaže svoje stavove i dok oči u oči ne kaže poslanicima šta od njih očekuje i šta oni od njega mogu očekivati. Međutim, o tome nije sada diskutovao već je zamolio I. Andrića ili da obnovi zahtjev za pauzu ili da svoj raniji zahtjev povuče.

Što se tiče programa koji je iznio Matić, Ljubić je rekao da bi bio sretniji da je isti dobio u pisanoj formi kako bi se mogao osvrnuti na pojedine navode, te da dosadašnje Vijeće ministara nije nacionalističko – kako je u izlaganju predsjedavajućeg Matića rečeno.

Ivo Andrić – Lužanski je ponovo prigovorio predsjedavajućem da krši Poslovnik jer mu nije dao pauzu, te je zahtjev za pauzu povukao.

Poslanik Ibrahim Đedović na početku svoje diskusije izrazio je nezadovoljstvo što predsjedavajući Matić nije našao za shodno da u konsultacijama razgovara i sa njim, iako je on potpisnik Prijedloga rezolucije, a razgovarao je sa onima koji i nemaju poslanike u Predstavničkom domu.

Što se tiče programa koji je iznio B. Matić, poslanik Đedović je, između ostalog, rekao da ga raduje što je prvi put slušao riječi koje se uglavnom baziraju na ekonomiji, radu, zapošljavanju, čemu se svi trebamo vratiti. Naglasio je da je predsjedavajući iznio niz pokazatelja o sadašnjem stanju u oblastima društva, ali da nije čuo kakvi će ti pokazatelji biti na kraju mandata predsjedavajućeg. Na kraju je rekao da će on, kao poslanik Demokratske narodne zajednice, bez obzira na konstantnu nekorektnost članova Alijanse prema njima, glasati za promjene, da bi se narodu probudila nada u mogućnost življenja u Bosni i Hercegovini.

Poslanik **Dušan Stokić** je prigovorio što poslanicima, makar dan prije sjednice, nije dostavljen program Matića. Izrazio je mišljenje da ni konsultacije sa političkim partijama nisu obavljene korektno, spomenuvši i primjer poslanika Đedovića.

Što se tiče programa Stokić je izrazio rezervu. Rekao je da je Partija demokratskog progresa RS donijela nekoliko zaključaka na kojima se insistiralo da budu ugrađeni u program B. Matića da bi poslanici PDP-a taj program podržali, te da je g. Matić u političkom dijelu svog programa većinu tih zaključaka manje-više unio. Međutim, jedan bitan, a koji je ključan, nije ugrađen – da Vijeće ministara neće davati prijedloge niti prihvaćati inicijative za preuzimanje nadležnosti entiteta mimo predviđene ustavne procedure, odnosno bez saglansosti entiteta. Naglasio je da će poslanici PDP-a insistirati na ovom principu, što je uslov da oni glasaju za program B. Matića, te da je njihova generalna zamjerka što se nigdje u političkom dijelu programa ne spominje Ustav BiH - barem jednom rečenicom – da će se dosljedno zalagati za poštivanje Ustava Bosne i Hercegovine. Zatražio je da se Matić izjasni da li će se ovaj princip unijeti u njegov program, pod kojim uslovom će poslanici PDP-a, kao i drugih partija iz toga Kluba, glasati za njega.

Poslanik **Osman Brka** je na početku diskusije rekao da on nema primjedbi na ekonomske kategorije o kojima je govorio B. Matić i da bi bilo jako dobro da te kategorije zažive u BiH. Međutim, rekao je da ima neke dileme i pitanja na koja nema odgovora. Naglasio je da ne može prihvatiti ocjenu Matića – da su nacionalističke stranke vladale Bosnom i Hercegovinom do sada, te da misli da uvaženi profesor mora da zna da razlikuje političke nijanse u Bosni i Hercegovini koje su očigledne. Rekao je, između ostalog, da SDA nikada nije bila nacionalistička, već da je bila stranka koja je okupljala sve patriote BiH, te da su oni bili snaga koja je branila Bosnu i Hercegovinu i svakog građanina.

Drugo pitanje koje je Brka postavio B. Matiću, jeste kako misli svoj program provesti na terenu, s obzirom da su političke vođe dijametralno suprotne. Treće što je Brka naglasio, jeste da ga je strah stila i načina pristupa u demokratskim uslovima, gdje

mandatar nije želio da sasluša stranke. Odsustvo razgovora i dijaloga sa strankama koje su do sada učestvovala u vlasti izaziva strah da ne idemo kakvom novom totalitarizmu. Bosna i Hercegovina je zemlja kompromisa, gdje nijedan političar nikada ne smije zaboraviti suštinsku vrijednost – da je to zemlja naroda i građana, i ne smije ispustiti iz vida nacionalne slobode i nacionalna i građanska prava, te ako jedno ili drugo isključi onda se radi direktno protiv Bosne i Hercegovine – rekao je, između ostalog, poslanik Osman Brka i zaključio da će on, kad dobije odgovore na postavljena pitanja, odlučiti kako će glasati.

Poslanik **Tihomir Gligorić** na početku diskusije prigovorio je B Matiću na riječima “nacionalističko Vijeće ministara” i rekao da on pripada građanskoj opciji i ne može prihvatiti takvu kvalifikaciju “koja je, inače, kod SDP-a uobičajena i neselektivno je primjenjuju na ljude i na stranke”, rekao je T. Gligorić i naglasio da se on kao čovjek zalaže i za građansku opciju i za nacionalno pitanje.

Što se tiče programa, Gligorić je, između ostalog, rekao da nije dobio osnovni odgovor kako riješiti probleme, osim uopštenih političkih obećanja. Podsjetio je da je on, kada je bio imenovan za predsjedavajućeg Vijeća ministara, na vrijeme poslanicima dostavio program, što su gospoda Lagumdžija, Tokić i drugi tražili, a danas se preko toga lako prelazi, što govori o dvostrukim standardima. Dalje je rekao da nije dat odgovor kako ispoštovati Ustav, nadležnosti i propisanu proceduru; nije dat odgovor šta se to želi sutra uraditi u novom Vijeću ministara, hoće li biti konsenzusa, hoće li biti preusmjerenja nadležnosti iz ministarstva u ministarstvo; kakve će to biti izmjene i dopune Zakona o Vijeću ministara; kako misle raditi, kako koordinirati, kako odlaziti u opštine, kantone, entitete; kako obezbijediti političku volju, skladnost i harmoniju u Bosni i Hercegovini; da li proizvoditi neprijatelje? Naglasio je da se potpuno jasno vidi da je cilj da se iz Sarajeva rukovodi na jedan birokratski centralizovan način, što je zlo koje smo ranije imali, i zapitao - da li to zlo, kada ga provodi Alijansa, postaje demokratsko načelo? Podvukao je da ni ovdje ne možemo imati dvostruke standarde, a u suprotnom, izazvaće se institucionalni kaos, za šta je takvu odgovornost teško preuzeti na sebe. Rekao je da nije dobra polarizacija odnosa u Bosni i Hercegovini i da svi zajedno moramo uzeti sudbinu u svoje ruke. Pozvao je Alijansu da ne izigrava pobjednike i poražene. Ukoliko to budu radili onda ne mogu izgraditi civilno društvo za koje se i on i njegova partija zalažu - rekao je, između ostalog, poslanik Tihomir Gligorić.

**Adem Borić** govorio je u ime Kluba poslanika Stranke demokratske akcije. Između ostalog, rekao je da Klub poslanika SDA cijeni da Vlada Božidara Matića ne može uspjeti. Kao razloge naveo je da B. Matić u ovom domu ima tijesnu podršku, pa prema tome i u javnosti i u građanstvu; vlada B. Matića je nedemokratska jer on nije pokazao ni minimum političke volje da ipak razgovara sa najjačim političkim strankama u Parlamentu po broju glasova. Rekao je da će Klub poslanika Stranke demokratske akcije ipak ovoj vladi pružiti šansu na način da će se uzdržati od glasanja.

Poslanik **Momir Tošić** je izrazio čuđenje da je B. Matić, kao profesor i akademik, potcijenio jedan kompletan narod, potcijenio je Srpsku demokratsku stranku koja ovdje ima šest poslanika i 50%, pa čak i dvije trećine birača iz srpskog naroda. Zapitao je kako očekuje da oni danas kao parlamentarci uopšte njemu daju podršku kada nije našao za shodno da uvaži one iza kojih stoji 50% srpskog biračkog tijela i 40% ukupnog biračkog tijela Republik Srpske. Takođe je M. Tošić skrenuo pažnju na zanemarivanje poslanika Hrvatske demokratske zajednice i naglasio da u ovom parlamentu mora biti kompromisa, te da još nije kasno da se napravi kompromis.

Poslanik **Abdurahman Malkić** u svojoj diskusiji je zatražio, između ostalog, odgovore na pitanja: kako mandatar Vijeća ministara misli koncipirati Bosnu i Hercegovinu uvažavajući najuže okruženje, pri čemu misli na Hrvatsku i Saveznu Republiku Jugoslaviju, te u kakvim je okvirima vidi u području uže regije i unutar

Evrope; kako misli uspostaviti zakonsku regulativu; na koji način misli regulisati funkcionisanje institucija države; pitanje poštovanja međunarodnih ugovora i konvencija; pitanje povratka; pitanje hapšenja i izručenja ratnih zločinaca i dr. Malkić je takođe prigovorio što Matić nije obavio razgovor sa svim parlamentarnim strankama, te ja zamolio da mu Matić da' odgovore na njegova pitanja.

Poslije diskusija predsjedavajući Avdić je dao riječ Božidar Matiću da odgovori na pitanja i prigovore iznesene u diskusiji.

U svom obraćanju Domu poslije diskusije poslanika Božidar Matić se posebno osvrnuo na diskusije Mire Grabovca, Mirka Banjca i Ive Andrića – Lužanskog.

U odgovoru na diskusiju Mire Grabovca Matić je rekao da bi mu bilo lako odgovoriti na diskusiju u kojoj ima argumenata. Na tvrdnju Grabovca da ovaj program zadužuje zemlju, rekao je da je očito da se Grabovac u svojoj ekonomskoj viziji nije pomakao poslije 1980. godine. Naglasio je da se nekada ova zemlja razvijala kreditima, a on u programu govori o direktnim stranim investicijama, što nije zaduživanje.

Mirku Banjcu B. Matić je odgovorio na dio gdje je Banjac rekao da nije razumio jezik. Rekao je da jezik kojim je govorio nije ni srpski, ni hrvatski, ni bosanski, nego jezik nove ekonomije koja na prvo mjesto postavlja konkurentsku sposobnost, jer samo onaj ko je konkurentno sposoban može preživjeti.

Ivi Andriću – Lužanskom objasnio je svoju izjavu na OBN-u.

U vezi s zamjerkama nekoliko stranaka što sa njihovim predstavnicima nisu obavljani razgovori, B. Matić je rekao da bi njegov lični ukus bio da razgovara sa svima, ali Alijansa je već bila formirana kada je njega zamolila da ovo odradi za njih, te da mu je Alijansa kazala ko čini vlast, ko će participirati u vlasti, pa je on po tim uputstvima i obavio razgovore. Inače, on nikoga ne smatra nedostojnim razgovora i lično smatra da je svaka osoba ovdje vrijedna i mnogo vrjednija nego što se uopšte misli, rekao je, između ostalog, B. Matić.

Na pitanje iz diskusije kakvi će biti pokazatelji na kraju mandata, B. Matić je rekao da se opet vraća na samo jedan pokazatelj – ako je BiH danas na 59. mjestu konkurentne sposobnosti, ako se pomaknemo i za dva mjesta gore, odradili smo nešto. To će značiti više ulaganja u BiH koje ne zadužuje.

Na zamjerku Dušana Stokića što nije spomenuo Dejton, Matić je prvo rekao da mu je dosta Dejtona, ne zbog njega nego zbog upotrebe – i kafane se zovu Dejton. Ali, naglasio je da u Programu stoji: «Ministarski savjet će u svom mandatu u punoj mjeri poštovati unutrašnju strukturu BiH definisanu Ustavom BiH», te da mu je sve drugo što bi rekao višak.

Na zamjerku da je rekao «nacionalne i nacionalističke» Matić je iznio jedan svoj pogled – kada neka stranka ispred svih ciljeva, pa i ispred sitosti naroda, postavi nacionalno – on je zove nacionalistička. Iznio je primjer koliko je vremena trebalo dok se uspostave jedinstvene tablice i pasoš, rekavši da imamo najskuplji pasoš na svijetu. Naglasio je da ne stavlja znak jednakosti ispred svih stranki i da ima bitna razlika između svih koje sebe zovu nacionalnim.

Na prigovor da misli na centralizovan način voditi Vijeće ministra, Matić je rekao da je u izlaganju rekao da će se sarađivati sa entitetima i svim nivoima vlasti.

Na konstataciju Adema Borićaa da će biti tijesna podrška, Božidar Matić je rekao da je to stvar Alijanse i da je on u funkciji ispunjenja zadataka Alijense.

Nakon izlaganja B. Matića predsjedavajući Doma Sead Avdić mu se zahvalio što je dao nužne odgovore na neka pitanja i neke kontroverze koje su proizašle iz njegovog izlaganja. Zamolio je za pažnju poslanika kako bi iznio nekoliko napomena.

Predsjedavajući **Avdić**, između ostalog, rekao je da se cijelo ovo vrijeme težilo da se ispoštuje demokratska procedura i Poslovnik Doma. U tom smislu izrazio je žaljenje

što su poslanici Hrvatske demokratske zajednice napustili sjednicu, vjerujući da je to samo trenutno i da će se ponovo vratiti u institucije sistema i ostvarivati političku volju građana koji su ih birali. Rekao je da trebamo biti svjesni činjenice da ovo nije Dom naroda nego Predstavnički dom koji se bira na neposrednom i tajnom glasanju putem otvorenih listi. Naglasio je da u ovoj našoj državi nacionalno i građansko nisu suprotstavljeni, te da u tom smislu treba razriješiti te dileme i otkloniti sumnje. Istakao je da će Kolegij braniti dignitet ovog doma i učiniti sve da Predstavnički dom Parlamentarne skupštine Bosne i Hercegovine ne bude demokratski privjesak odluka međunarodne zajednice. Samo na principima međusobnog sporazumijevanja, kao partneri i sudionici u realizaciji Dejtonskog mirovnog sporazuma, možemo realizovati najbitnije poslove i zadatke. U tom smislu ni program koji je izložio B. Matić nije optimizam bez pokrića i da ima smisla vjerovati da se može ostvariti, rekao je, između ostalog, predsjedavajući Avdić.

Zatim je predsjedavajući Avdić pozvao poslanike da se izjasne o odobrenju imenovanja predsjedavajućeg Vijeća ministara.

Od 35 prisutnih poslanika u momentu glasanja ZA odobrenje imenovanja glasala su 22, PROTIV su glasala 3, a 10 poslanika se suzdržalo.

Glasajući po entitetima, iz Republike Srpske ZA je glasalo 6, iz Federacije BiH ZA je glasalo 16 poslanika.

Predsjedavajući Avdić je konstatovao da je Dom odobrio imenovanje dr Božidara Matića za predsjedavajućeg Vijeća ministara Bosne i Hercegovine.

#### **Ad – 1.b)** – Odobrenje imenovanja ministara i zamjenika ministara

Predsjedavajući Vijeća ministara, Božidar Matić, iznio je prijedlog za sastav Kabineta.

Diskutovao je poslanik Mirko Banjac, a potom je predsjedavajući Doma dao pauzu kako bi se poslanicima dostavile biografije predloženih ministara i zamjenika ministara.

Poslije pauze nije bilo diskusija, pa je obavljeno glasanje o odobrenju imenovanja ministara i zamjenika ministara.

Sa 22 glasa ZA (35 prisutnih) Dom je odobrio imenovanje ministara i zamjenika ministara u Vijeću ministara Bosne i Hercegovine.

Po entitetima, iz Republike Srpske ZA je glasalo 6, a iz Federacije BiH 16 poslanika.

Predsjedavajući Avdić je konstatovao da je odobreno imenovanje ministara i zamjenika ministara kako je predložio predsjedavajući Vijeća ministara. Prema tome, imenovani su ministri i zamjenici kako slijedi:

#### **Ministarstvo za trezor institucija BiH**

Božidar Matić - ministar (SDP)

Muharem Imamović – zamjenik ministra (SDP)

Gordana Ković – zamjenik ministra (DSP)

#### **Ministarstvo za evropske integracije**

Dragan Mikerević – ministar (PDP)

Rasim Kadić – zamjenik ministra (LDS)

Zora Marijanović – zamjenik ministra (SDP)

#### **Ministarstvo za ljudska prava i izbjeglice**

Krešimir Zubak – ministar (NHI)

Kadrija Haračić – Šabić – zamjenik ministra (BPS)

Vladislav Vladičić – zamjenik ministra (SNSD)

**Ministarstvo za vanjske poslove**

Zlatko Lagumdžija - ministar (SDP)  
Ivica Mišić – zamjenik ministra (HSS)  
Milovan Blagojević – zamjenik ministra (PDP)

**Ministarstvo za civilne poslove i komunikacije**

Svetozar Mihajlović – ministar (SNS)  
Jusuf Halilagić – zamjenik ministra (SzBiH)  
Milan Lovrić – zamjenik ministra (SDP)

**Ministarstvo za vanjsku trgovinu i ekonomske odnose**

Azra Hadžiahmetović – ministar (SzBiH)  
Jadranko Prlić – zamjenik ministra (NHI)  
Nikola Kragulj – zamjenik ministra (SNSD)

Poslije glasanja prisutni ministri i zamjenici pred Predstavničkim domom dali su svečanu izjavu. Izjavu nisu dali Jadranko Prlić i Gordana Ković zbog odsustva.

Poslije davanja svečane izjave predsjedavajući Vijeća ministara, Božidar Matić, u ime Vijeća ministara, zahvalio se na povjerenju i rekao da će se truditi da ispoštuju datu zakletvu.

Dosadašnji ministar Mirsad Kurtović, u odsustvu dosadašnjeg predsjedavajućeg Vijeća ministara, Martina Raguža, u svoje ime i u ime kolega iz prethodnog Vijeća ministara, čestitao je novom Vijeću ministara i poželio im puno uspjeha i dobru atmosferu u radu.

Ovim je završena 4. sjednica. Rad sjednice završen je u 15,00 sati.

Sastavni dio ovog zapisnika je magnetogram Četvrte sjednice Predstavničkog doma.

**S E K R E T A R**  
**PREDSTAVNIČKOG DOMA**  
**Branka Todorović**

**PREDSJEDAVALAČI**  
**PREDSTAVNIČKOG DOMA**  
**dr. Sead Avdić**